

## Hezkuntza zuzendariaren autoa erre dute Zizurren

■ Gipuzkoan PSE-EEko zinegotzi baten bulegoari eta kontzesionario bati egin diete eraso

Erredakzioa / Donostia

SABOTAJE ekintza zenbait izan ziren ostiral gauean Euskal Herrian. Nafarroako Gobernuko Hezkuntza zuzendariari, Santiago Arellanori, autoa erre zioten, eta erabat kiskalita gelditu zen. Goizaldeko 01:30ak aldera gertatu zen eraso. Zizur Nagusiko Iturbarrena kalean, han utzia baitzuen Arellanok autoa. Gasolinaz igurtzi eta su eman zioten ezezagun batzuek.

Bestalde, Ordizian indar gutxiko lehergailu bat zartatu zen Jose Manuel Ros PSE-EEko zinegotziaren bulegoan. Atean jarria zegoen, eta leherketak kalte txikiak eragin zituen. Gainera, suhiltzaileek berehala itzali zuten. Kanpin gas bi ontzi eta erreagaiz osatua zegoen.

Hernanin, berriz, Peugeot kontzesionarioari eman zioten sua. Gauerdia baino lehentxeago saretak bor-

txatu eta molotov koktelak jaurti zituzten barrura. Ondorioz, lau autok kalteak jasan zituzten, eta keagatik gaineko zenbait etxebizitza hustu egin zituzten.

### EHrekin ez hitz egiteko eskaera

Aipatu erasoak direla eta, salaketa gogorak egin zituzten bereziki PSOEko eta PPko buruzagiek. EHrekin negoziazioak eteteko eskatu zion Nicolas Redondo Terrerosek, EAEko sozialisten buruzagiak, Juan Jose Ibarretxe lehendakariari. Felipe Gonzalezek, berriz, kale borroka Lizarrako Hitzarmenean idatziz agertzen ez den zatia dela esan zuen. PPko Ignacio Gil Lazaroren ustez, HB ez dagoela bakearen alde adierazten dute horrelako ekintzek. EAK eta IUK, azkenik, bake prozesuaren kalterako direla azaldu zuten.

## Iruretagoienari omenaldia egin diote PPk eta Zarauzko Udalak

ETAren biktimekin «betirako zorra» dagoela dio Iturgaitzek

Agentziak / Zarautz

Jose Ignacio Iruretagoiena Zarauzko PPko zinegotzia atentatuan hil zutela urtebete bete zen atzo, eta PPk eta Zarauzko Udalak omenaldi bana egin zio-

ten hilketaren urteurrenean. Carlos Iturgaitzek esan zuen euskal gizarteak betirako zorra duela ETAren biktimekin. Gogor aritu zen ezker abertzalearen kontra: «ETAk eta HBk, PP Euskaditik desagertzeari nahi dute».



ANTONIO ALONSO / EFE

Imanol Murua eta Carlos Iturgaitz elkar agurtzen, Jose Ignacio Iruretagoienari atzo egindako omenaldian.

EGUERDI partean eta euri-pean egin zituzten Iruretagoienaren omenezko lore eskaintzak Zarauzko hilerrian. Lehenik Udaleko ordezkariak egin zuten euren, Imanol Murua alkatea eta zenbait zinegotzi bertan zirela. Ondoren PPk antolatutako omenaldia egin zen eta bertan parte hartu zuten udal ordezkariak ere. Lore eskaintza eta errezu bat egin zuten hilobiaren ondoan. Carlos Iturgaitz EAEko PPko presidentea alderdiko beste zenbait kiderekin joan zen eta Iruretagoienaren senitatekoekin egon zen ekitaldian zehar.

Ekitaldia amaitu ostean, Carlos Iturgaitzek ETAren biktima guztiak ekarri zituen gogora, eta bereziki Iruretagoiena: «Bere eskubideak zapaldu zituzten ETAk eta bere munduak, HB buru duela, hainbeste herritarren eskubideekin egin duten moduan». PPko karguen etxetan egin diren protestaldiak eta azken kale istiluak gogoratuz oraindik urrunago joan zen Iturgaitz: «ETAk, HB, AAB eta Senideak lagunduta PP Euskaditik desagertu dadin nahi dute». Hala eta guztiz PPko kideek lanean jarraituko dutela azaldu zuen.

Iturgaitzekin batera izan ziren, Gabriel Cisneros PPko diputatua, Enrique Villar Gobernuaren EAEko ordezkaria eta Eduardo Ameijide Gobernuaren Gipuzkoako ordezkariordea.

Imanol Murua Zarauzko alkateak hilerritik irtetean tristuraz gogoratu zuen Iruretagoienaren heriotza. Omenaldiarekin Iruretagoiena lankide gisa gogoratu nahi izan zutela azaldu zuen. «Egun ikaragarri hura gogoratu nahi genuen omenaldi xume batekin, eta berriz horrelakorik gerta ez dadin eskatu», azaldu zuen Murua.

## Jaurlaritzak 257 milioi zuzendu ditu lau urtetan terrorismoaren biktimentzat

Agentziak / Gasteiz

EUSKO JAURLARITZAKO Indarkeriaren Biktimen Laguntzarako Bulegoak 257 milioi pezeta erabili ditu lau urtetan (10,28 milioi libera inguru) biktimen kalteordainei aurre egiteko. Javier Balzak zuzentzen duen Herrizaingo Sailak atzo emandako datuen arabera,

guztira 2000 espediente aurkeztu dituzte indarkeriaren biktimek 1994tik aurrera, eta horietatik 762 iaz aurkeztu zituzten.

Herrizaingo Sailak jakitera eman duenez, 257 milioi pezetatik 139,7 milioi ibilgailuetan eragindako kalteak ordaintzeko erabili dira, kopuru osoaren %54,4a

hain zuzen ere. Gainontzeak, bankuei, komertzioei eta pertsonen laguntzeko zuzendu dute.

Bestetik, Herrizaingo Sailaren barruan dagoen Indarkeriaren Biktimen Laguntzarako Bulegoak biktimei laguntza psikologikoa emateko zerbitzua ere jarri du lau urteotan.